



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

ADMINISTRATIVNA KOMISIJA

PRAVILNIK
o ostvarivanju prava na korištenje prevoza službenim vozilima za nositelje funkcija u
Gradu Sarajevu i Pravobranilaštvu Grada Sarajevo

Sarajevo, maj 2024. godine

Adresa: Hamdije Kreševljakovića 3
71 000 Sarajevo
Tel.: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 20. Odluke o platama i naknadama u organima Grada Sarajeva („Službene novine Kantona Sarajevo“, br. 4/23 i 14/24) i člana 49. stav 1. alineja 1. Poslovnika Gradskog vijeća Grada Sarajeva („Službene novine Kantona Sarajevo“, br. 28/09, 11/20 i 19/20), Administrativna komisija Gradskog vijeća Grada Sarajeva, na 73. sjednici održanoj dana 10.05.2024. godine donijela je

PRAVILNIK

o ostvarivanju prava na korištenje prevoza službenim vozilima za nositelje funkcija u Gradu Sarajevu i Pravobranilaštvu Grada Sarajeva

Član 1. (Predmet regulacije)

- (1) Ovim pravilnikom bliže se regulišu uslovi i način korištenja službenih vozila u vlasništvu Grada Sarajeva za potrebe prevoza Nositelja funkcija u Gradu Sarajevu i Pravobranilaštvu Grada Sarajeva.
- (2) Službeno vozilo, u smislu ovog pravilnika, je svako putničko motorno vozilo u vlasništvu Grada Sarajeva, a koje se koristi za potrebe obavljanja poslova i zadataka iz nadležnosti Grada Sarajeva koje vrše Nositelji funkcija u Gradu Sarajevu i Pravobranilaštvu Grada Sarajeva.

Član 2. (Način korištenja)

- (1) Službena vozila se koriste isključivo u službene svrhe odnosno za obavljanje poslova i zadataka iz nadležnosti Grada Sarajeva, kao što su: službeni prevoz do sjedišta Grada Sarajeva, službeni prevoz od sjedišta Grada Sarajeva do sjedišta drugih organa, preduzeća, organizacija i ustanova, službeni prevoz od i do mjesta polaska, odnosno dolaska drugog prevoznog sredstva (aerodrom, željeznička ili autobuska stanica i sl.), prevoz radi prisustva sjednicama, sastancima i drugim službenim skupovima, prevoz radi obavljanja poslova protokolarne prirode, prevoz delegacija Grada Sarajeva prema potrebi, koje po službenom pozivu dolaze u Grad Sarajevo sa programom boravka, kao i prevoz u svim drugim slučajevima za koje postoji potreba upotrebe službenog vozila radi obavljanja poslova i zadataka iz nadležnosti Grada Sarajeva ako se ti poslovi moraju obaviti izvan njegovog sjedišta.
- (2) Službena vozila u vlasništvu Grada Sarajeva se ne smiju koristiti u privatne svrhe.
- (3) Službena vozila se mogu koristiti u službene svrhe u zemlji i inostranstvu uz puno poštivanje propisa Grada Sarajeva koji reguliraju lokalnu vožnju unutar Kantona Sarajevo, vožnju izvan Kantona Sarajevo, korištenje službenog vozila za potrebe službenog putovanja, te uz obavezno popunjavanje odgovarajućih putnih naloga/obrazaca u skladu sa propisima.

Član 3. (Nosioci prava na korištenje prevoza službenim vozilima)

- (1) Pravo na korištenje prevoza službenim vozilima imaju:
 - Gradonačelnik Grada Sarajeva;
 - Predsjedavajući Gradskog vijeća Grada Sarajeva;
 - Zamjenici gradonačelnika Grada Sarajeva;
 - Zamjenici predsjedavajućeg Gradskog vijeća Grada Sarajeva;

- Pravobranilac Pravobranilaštva Grada Sarajeva;
 - Zamjenici pravobranioca Pravobranilaštva Grada Sarajeva;
 - Rukovodilac upravne organizacije koja se nalazi u sastavu organa uprave.
- (2) Gradonačelnik Grada Sarajeva i predsjedavajući Gradskog vijeća Grada Sarajeva imaju pravo na stalno korištenje službenog vozila sa vozačem u službene svrhe.
- (3) Zamjenici gradonačelnika Grada Sarajeva, zamjenici predsjedavajućeg Gradskog vijeća Grada Sarajeva, Pravobranilac Pravobranilaštva Grada Sarajeva, zamjenici pravobranioca Pravobranilaštva Grada Sarajeva, rukovodilac upravne organizacije koja se nalazi u sastavu organa uprave imaju pravo na korištenje prevoza službenim vozilima sa vozačem za potrebe obavljanja poslova i zadataka iz nadležnosti Grada Sarajeva iz člana 2. ovog pravilnika u zavisnosti od raspoloživosti službenih vozila i vozača Grada Sarajeva u datom momentu.
- (4) Nositelji funkcija navedeni u stavu 1. ovog člana ne mogu upravljati službenim vozilima bez vozača.
- (5) Odredbe gradskih propisa koje reguliraju korištenje vlastitih motornih vozila u službene svrhe shodno se primjenjuju i na korištenje vlastitih motornih vozila od strane Nositelja funkcija u Gradu Sarajevu i Pravobranilaštvu Grada Sarajeva.

Član 4. **(Ekonomičnost)**

Prilikom korištenja službenog vozila treba voditi računa da se službeno vozilo koristi u onim slučajevima kada korištenje drugog prevoza nije prostorno i vremenski ekonomično i efikasno, te je potrebno voditi računa da kod putovanja u istom pravcu, službeno vozilo koristi više lica.

Član 5. **(Nadležna Služba za realizaciju Pravilnika)**

Realizaciju i praćenje ostvarivanja prava koja proizilaze iz ovo pravilnika vršit će Gradska služba za opću upravu i zajedničke poslove u čijem djelokrugu rada se nalaze poslovi osiguranja korištenja službenih vozila i vozača Grada Sarajeva u koordinaciji sa stručnim službama nadležnim za kabinetskim poslove u Gradskoj upravi i poslove Gradskog vijeća odnosno Pravobranilaštvom Grada Sarajeva u skladu sa ovim pravilnikom kao i važećim gradskim propisima i podzakonskim aktima gradonačelnice.

Član 6. **(Shodna primjena)**

- (1) Na pitanja načina korištenja službenog vozila, osiguranja korištenja službenog vozila za prevoz unutar Kantona Sarajevo, van Kantona Sarajevo i za potrebe službenog putovanja, zaduženja službenog vozila i vozača, izrade putnog naloga za vozilo i vozača, zaduženje i održavanje službenog vozila, odgovornost za upravljanje službenim vozilom, korištenje vlastitih motornih vozila za službene svrhe, vođenje evidencije korištenja službenog vozila, kao i na ostala pitanja koja nisu regulisana ovim pravilnikom shodno se primjenjuju gradski propisi i podzakonski akti gradonačelnika koji reguliraju ova pitanja.
- (2) Osiguranje provedbe propisa navedenih u prethodnom stavu ovog člana vrši Gradska služba za opću upravu i zajedničke poslove u koordinaciji sa stručnim službama nadležnim za kabinetskim poslove u Gradskoj upravi i poslove Gradskog vijeća odnosno Pravobranilaštvom Grada Sarajeva.

Član 7.
(Ravnopravnost spolova)

Odredbe ovog Pravilnika odnose se podjednako na lica muškog i ženskog spola, bez obzira na rod imenice upotrebljen u tekstu Pravilnika.

Član 8.
(Stavljanje van snage)

Stupanjem na snagu ovog Pravilnika stavlja se van snage Pravilnik o pravu korištenja službenih putničkih vozila za funkcionere u organima Grada Sarajeva, broj: 02-02-719-1/17 od 18.04.2017. godine.

Član 9.
(Stupanje na snagu)

Ovaj Pravilnik stupa na snagu danom donošenja i objavit će se na službenoj internetskoj stranici Grada Sarajeva i u „Službenim novinama Kantona Sarajevo“.

PREDSJEDAVAJUĆI ADMINISTRATIVNE KOMISIJE

Jasmin Ademović, s.r.

Broj: 04-GV-04-651-1.1/24
Sarajevo, 10.05.2024. godine